

III. OUTRAS DISPOSICIÓNS

CONSELLERÍA DO MEDIO RURAL

*RESOLUCIÓN do 28 de decembro de 2022, da Dirección Xeral de Gandaría, Agricultura e Industrias Agroalimentarias, pola que se prorrogan todas as medidas fitosanitarias establecidas na Resolución do 8 de marzo de 2017 pola que se establecen as zonas infestadas e as zonas tampón e se implementan as medidas para a erradicación e control con respecto ao organismo de corentena *Tecia Solanivora Povolny*, ou couza guatemalteca da pataca, na Comunidade Autónoma de Galicia.*

Antecedentes:

A praga denominada couza guatemalteca da pataca, provocada polo organismo nocivo denominado *Tecia solanivora Povolny* ou *Scrobipalopsis solanivora Povolny*, foi detectada na Comunidade Autónoma de Galicia en agosto do ano 2015.

A través de resolucións da Dirección Xeral de Gandaría, Agricultura e Industrias Agroalimentarias declarouse a presenza da praga e establecéronse as zonas demarcadas e as medidas urxentes de obrigado cumprimento tanto para produtores profesionais e de autoconsumo deste tubérculo, como para os puntos de venda de pataca de semente.

O 4 de marzo de 2017 publicouse o Real decreto 197/2017, do 3 de marzo, polo que se establece o Programa nacional de control e erradicación de *Tecia (Scrobipalopsis) solanivora Povolny* (BOE núm. 54, do 4 de marzo). O artigo 6.5 deste real decreto establece que nas comunidades autónomas onde o cultivo da pataca se faga de forma maioritaria nun gran número de pequenas parcelas, repartidas irregularmente por todo o territorio e por agricultores non profesionais que dedican toda a súa produción ao autoconsumo ou á venda directa en mercados locais, poderán redefinirse as zonas infestadas para adaptalas ao seu territorio, ampliándoas, de ser o caso, a todo o termo municipal.

O artigo 8.1.a) do real decreto indica, ademais, que se prohibirá a plantación de cultivos de pataca durante un período mínimo de dous anos. Transcorrido este prazo, a autoridade competente valorará a situación da praga, en especial se non se conseguiu acadar o obxectivo da erradicación, e poderá prorrogar o período de vixencia desta prohibición.



A Resolución do 24 de novembro de 2021, da Dirección Xeral de Gandaría, Agricultura e Industrias Agroalimentarias (DOG núm. 236, do 10 de decembro), declarou as zonas infestadas e as zonas tampón vixentes nese momento e mantivo todas as medidas fitosanitarias establecidas previamente pola Resolución desta mesma dirección xeral, do 8 de marzo de 2017(DOG núm. 49, do 10 de marzo).

Hoxe en día os datos de seguimento da presenza deste organismo nocivo mostran un avance significativo na súa contención, previa a unha posible erradicación, xa que en todos os concellos declarados previamente como demarcados, excepto o concello de Burela, a parroquia de Trabada (Santa María) no concello de Trabada, na provincia de Lugo, e as parroquias de Sorrizo (San Pedro) e Chamín (Santaia), no concello de Arteixo e de Caión (Santa María do Socorro), no concello da Laracha, non se detectou a presenza deste organismo durante dous anos consecutivos. Por outra parte, da análise recente dunhas mostras obtidas de varias trampas localizadas no campo e en explotacións da parroquia da San Xurxo de Moeche, incluída ata ese momento na zona tampón, no concello de Moeche, constatáronse novas deteccións deste organismo, polo que esta parroquia deberá declararse como zona infestada e aplicaranse nela as medidas fitosanitarias establecidas na mencionada Resolución do 8 de marzo de 2017.

Por todo o anteriormente exposto,

RESOLVO:

1. Ampliar a zona infestada pola existencia da praga denominada *Tecia solanivora* Povolny, couza guatemalteca da pataca na Comunidade Autónoma de Galicia á parroquia de San Xurxo de Moeche no concello de Moeche, na provincia da Coruña. Os anexos I e II mostran a relación e o plano de situación das actuais zonas demarcadas de *Tecia solanivora*.

2. As persoas da parroquia indicada no punto 1 deberán presentar unha declaración das existencias de pataca almacenada para os efectos de que os servizos oficiais procedan a súa retirada e destrución por considerarse este tubérculo como material contaminado. A declaración de existencias, conforme o modelo do anexo I da Orde do 6 de xullo de 2021 (DOG núm. 138, do 21 de xullo), poderá presentarse na oficina agraria comarcal máis próxima ou en calquera dos lugares e rexistros establecidos na normativa reguladora do procedemento administrativo común ou a través da sede electrónica da Xunta de Galicia (<https://sede.xunta.gal/portada>) utilizando o procedemento MR465B. O prazo será de vinte días hábiles, contados a partir do



día seguinte ao da publicación no DOG da presente resolución. Con posterioridade á retirada deste tubérculo deberán desinsectar o solo, as paredes e o teito da zona de almacenamento.

3. Deixan de ser consideradas zonas infestadas e pasan a ser consideradas zonas tampón:

Na provincia da Coruña:

– A parroquia de Lendo (San Xián), no concello da Laracha.

– As parroquias de Nosa Señora da O (Santa María), Leis de Nemancos (San Pedro), Muxía (Santa María), Moraime (San Xulián) e San Martiño de Ozón (San Martiño), no concello de Muxía.

4. Son consideradas zonas infestadas:

Na provincia da Coruña:

– As parroquias de Sorrizo (San Pedro) e Chamín (Santaia), no concello de Arteixo.

– A parroquia de Caión (Santa María do Socorro), no concello da Laracha.

– A parroquia da Pedra (Santa María), no concello de Cariño.

– A parroquia de San Xurxo de Moeche, no concello de Moeche.

Na provincia de Lugo a totalidade da superficie do concello de Burela e a parroquia de Trabada (Santa María), do concello de Trabada.

5. Son consideradas zonas tampón:

Na provincia da Coruña:

– A totalidade da superficie dos concellos de Cedeira, Cerdido, Mañón, Muxía, Narón, San Sadurniño e Valdoviño.

– Todas as parroquias non incluídas na zona infestada dos concellos de Cariño e Moeche.

– A parroquia das Somozas (Santiago Seré), no concello das Somozas.



– As parroquias de Monteagudo (San Tomé), Barrañán (San Xián) e Armentón (San Pedro), no concello de Arteixo, Rebordelos (San Salvador) e Noicela (Santa María), no concello de Carballo, e Lendo (San Xián), no concello da Laracha.

Na provincia de Lugo:

– A totalidade dos concellos de Alfoz, Barreiros, Cervo, Foz, Lourenzá, Mondoñedo, Ribadeo, O Valadouro, O Vicedo, Viveiro e Xove.

– Todas as parroquias non incluídas na zona infestada do concello de Trabada.

6. Serán consideradas zonas non demarcadas na provincia da Coruña a parroquia de Vilela no concello de Carballo, as parroquias de Lemaio (Santa María), Cabovilaño (San Román) e Torás (Santa María), no concello da Laracha, e a franxa de 5 km limítrofe cos concellos infestados que afecta parcelas dos concellos de Camariñas, Dumbría e Vimianzo.

7. Manter todas as medidas fitosanitarias establecidas na Resolución do 8 de marzo de 2017 e, en concreto, a expresa prohibición do cultivo de pataca nas zonas infestadas. Tamén se prohíbe a saída de pataca de consumo da zona infestada excepto, no caso de tránsito. No caso de ser necesario o tránsito con orixe e destino en zonas non infestadas, o vehículo deberá ir totalmente pechado cunha estrutura ríxida ou cunha lona protectora que se axuste perfectamente coa caixa do camiión e impida calquera contacto dos tubérculos co exterior. Os vehículos non deberán estacionarse nestas zonas máis do tempo necesario para os descansos obrigatorios do transportista e deberán abandonalas á maior brevidade co fin de evitar o risco de contaminación. Se o motivo da entrada de pataca na zona infestada é subministrar pataca dentro desa zona, en ningún caso, a pataca que entrou poderá saír da dita zona.

8. Os agricultores de todas as zonas tampón declaradas en Galicia deberán comunicar inmediatamente despois da sementeira, e en todo caso antes do 1 de abril, todas as parcelas cultivadas con pataca, segundo o modelo establecido no anexo II da Orde do 6 de xullo de 2021 (DOG núm. 138, do 21 de xullo). Poderá presentarse na oficina agraria comarcal máis próxima ou en calquera dos lugares e rexistros establecidos na normativa reguladora do procedemento administrativo común ou a través da sede electrónica da Xunta de Galicia (<https://sede.xunta.gal/portada>) utilizando o procedemento MR465C.



En canto ao destino desta pataca:

– Se é de autoconsumo, para a súa produción aplicaranse as medidas establecidas no artigo 8.4 do Real decreto 197/2017 e o seu movemento realizarase sempre en vehículos pechados ou cubertos cunha malla.

– Se é de comercialización, para a súa produción aplicaranse as medidas establecidas no artigo 8.4 do Real decreto 197/2017. A instalación de almacenamento deberá cumprir co establecido no artigo 8.5 do Real decreto 197/2017, deberá estar inscrita no Rexistro Oficial de Produtores, Comerciantes e Importadores de Vexetais (ROPCIV) e o movemento de pataca deberá realizarse en vehículos pechados ou cubertos cunha malla e sempre acompañados do correspondente pasaporte fitosanitario.

9. Os operadores de pataca de semente na Comunidade Autónoma de Galicia deberán cumprir os seguintes requisitos:

a) En zonas infestadas por couza guatemalteca non poderán ter existencias nin comercializar este tipo de pataca.

b) En zonas tampón e zonas non demarcadas de couza guatemalteca deberán:


– Levar o rexistro de información dos compradores de pataca de semente indicado no punto 2 da Resolución do 9 de febreiro de 2017.

– Os operadores situados en zona tampón, ademais, deberán instalar no local destinado a almacén unhas trampas de feromona específica para a captura de *Tecia solanivora*.

Santiago de Compostela, 28 de decembro de 2022

Silvestre José Balseiros Guinarte
Director xeral de Gandaría, Agricultura e Industrias Agroalimentarias



ANEXO I**Plano de situación das zonas demarcadas de *Tecia solanivora* Povolny**

CVE-DOG: qlondk01-agd8-g046-4aq5-kh6gbiitl6



ANEXO II
Relación de zonas demarcadas de *Tecia solanivora Povolny*

Zona demarcada	Provincia	Concello	Parroquia	
Zona infestada	A Coruña	Arteixo	Chamín (Santaia) Sorrizo (San Pedro)	
		Cariño	A Pedra (Santa María)	
		Laracha (A)	Caión (Santa María do Socorro)	
		Moeche	San Xurxo de Moeche (San Xurxo)	
	Lugo	Burela	Todas	
		Trabada	Trabada (Santa María)	
Zona tampón	A Coruña	Arteixo	Monteagudo (San Tomé) Barrañán (San Xíán) Armentón (San Pedro)	
		Carballo	Rebordelos (San Salvador) Noicela (Santa María)	
		Cariño	Cariño (San Bartolomeu) Feás (San Pedro), Landoi (Santiago), Sismundi (San Esteiro)	
		Cedeira	Todo o concello	
		Cerdido	Todo o concello	
		Laracha (A)	Lendo (San Xíán)	
		Mañón	Todo o concello	
		Moeche	Santa Cruz de Moeche (Santa Cruz) Labacengos (Santa María) Abade (Santiago) San Xoán de Moeche (San Xoán)	
		Muxía	Todo o concello	
		Narón	Todo o concello	
		San Sadurniño	Todo o concello	
		Somozas (As)	As Somozas (Santiago Seré)	
		Valdoviño	Todo o concello	
		Lugo	Alfoz	Todo o concello
			Barreiros	Todo o concello
			Cervo	Todo o concello
			Foz	Todo o concello
			Lourenzá	Todo o concello
			Mondoñedo	Todo o concello
	Ribadeo		Todo o concello	
	Trabada		A Valboa (Santa María Madanela) A Fórnea (Santo Estevo) A Ría de Abres (Santiago) Sante (San Xiao) Vidal (San Mateo), Vilaformán (San Xoán) Vilapena (Santiago)	
	Valadouro (O)	Todo o concello		
	Vicedo (O)	Todo o concello		
	Viveiro	Todo o concello		
	Xove	Todo o concello		

